

In giuven chantadur engaschè

Chasper-Curò Mani survegn in premi da promoziun dal chantun Grischun

DA RICO VALÄR

■ **Venderdi saira ha lieu a Cuira la surdada dals premis culturals dal chantun Grischun, in dals premis da promoziun va a Chasper-Curò Mani da Tavau. Il giuven da 26 onns è creschì si en ina famiglia rumantscha, sia mamma è da Scuol, ses bab è d'Andeer.** La musica l'ha accompagnà gia da pitschen ensi: Tras il bab musicist ed enconuscent cumpositur e la mamma che ha sunà clavazin e chantà en divers chors è la chasa adina stada emplenida da tuns e suns. Dasper la ghitarra ed il clavazin ha'l cumenza cun 18 onns a pigliar uras da chant. Gia da gimnasiast ha'l chantà en differents chors e sunà en diversas furmaziuns.

Al Conservatori da Turitg ha *Chasper-Curò Mani* studegià chant tar Jane Thorer-Mengedoth e clavazin en il rom lateral. Questa primavaira ha'l fatg il diplom d'instrucziun cun la distincziun la pli auta. Sco che Chasper-Curò quinta èsi stà durant il studi fitg impurtant da dastgar giudair ina furmaziun vasta e d'avair spazi per experimentar. Uschia ha'l visità divers curs da drammatica, improvvisaziun, da chant da jazz, da chanson ed auter pli. Per studegiar chant dovrà ins blera disciplina: «Sco in sportist sto er in chantadur trenar mintga di la vusch ed il corp. Per chantar dovrà ins tut il corp, gista per parts extremas en dinamica e colurs, per tuns auts e lungs ston ins esser fit.» Per mantegnair sia cundiziun gioga il chantadur unihockey



Chasper-Curò Mani survegn in premi da promoziun chantunal.

MAD

e tennis. Dentant èsi er impurtant da chattar in equiliber tranter lavur e paus: «La vusch è in instrument sensibil che na cumporta betg trais maratons l'emna.»

Dapi questa stad studegia Chasper-Curò Mani per il diplom da concert. Tar quest studi d'approfondaziun sa tracta oravant tut da sa concentrar sin il chant classic e da sviluppar e chattar in repertori adattà a la persuna e la vusch. Or d'interess fa'l anc in studi supplementar per diriger chors. Sper il chant solistic ha il giuven Grischun adina gia chantà gu-

gent en ensembles: Sco gimnasiast tranter auter en il Bündner Vokalensemble, lura en il Chor svizzer da giuvenils e questa stad è'l stà sin turnea en l'Africa dal sid ed en Namibia cun il Chor mundial da giuvenils. El fa er part dal pitschen chor professiunal da *Rudolf Lutz* che vegn a registrar en ils proxims onns las passa 300 ovras vocalas da Bach sin dc.

Chasper-Curò Mani ha sez inizià divers ensembles: El è confundatur dad «Operton – junge oper zürich», ina gruppa da quatter chantadurs che portan la re-

sponsabladad artistica e l'organisaziun da differents projects d'opera: «Nus lain ans etabli sco ensemble professiunal d'opera e porscher programs attractivs era per giuvens.» Cun success han els preschentà ils ultims onns ovras da Rossini, Haydn ed in'opera experimentala en l'areal da Toni. Cun il quartet a capella «les confitures» sa deditgescha'l a programs variads da musica vocala che divertescha. Lur finamira è da lavurar vi da la fusiun ideala da las quatter vuschs. Divers concerts ha'l dà cun la furmaziun «ecos de sepharad»: «En collavuraziun cun ina chantadura, ina cellista, ina ghitarrista ed in'actura avain nus creà ina performance che unescha texts, chant e musica da la cultura dals Sefards.»

In'expertscha sociala che ha impressiunà Chasper-Curò Mani è stada la lavur cun impedids en terapias da musica. «Tras la musica ed il ritmus avain nus communitgà ad in nivel emoziunal en moda fitg activa. La musica confrunte-scha mintgin cun ses agen corp e lascha participar tuts.»

Suenter il studi sperescha Chasper-Curò Mani da pudair sa preschentar tar operas e pigliar part da concorrenzas per pudair viver sco chantadur. Il matg vegn el a chantar sco solist a Cuira en ina messa da Bach cun il Singkreis Heiligkreuz. «Jau ma legrel fitg sin il concert en Grischun. Pil mument chant jau bler a Turitg, dentant ma fessi grond plaschair da chantar en futur puspè dapli en la patria grischuna, forsa schizunt en projects rumantschs.»